

Zeitschrift: Annalas da la Societad Retorumantscha
Herausgeber: Societad Retorumantscha
Band: 77 (1964)

Nachruf: Robert Corrado Ganzoni : vegl cusglier guvernativ : 7 settember 1884,
20 gün 1963

Autor: Schorta, Andrea

Nutzungsbedingungen

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

Download PDF: 23.08.2025

ETH-Bibliothek Zürich, E-Periodica, <https://www.e-periodica.ch>

Robert Corrado Ganzoni

*vegl cusglier guvernativ
* 7 settember 1884, † 20 gün 1963*

dad Andrea Schorta

L'inviern da l'an 1922 o 1923 sar professer Niculin Gisep avaiva stimulà a traís o quatter scolars rumantschs da la Scoula chantunala da tour part sco giasts a la radunanza da delegats da la «Lia ruman-tscha». Cun ün miel battacour ais eir il scriptur da quaistas lingias entrà illa bella saletta dal «Monopol» a Cuoir (hoz büros dal Cu-mand dal circuit militar), ed as tschantet giosom maisa tanter seis amis plü vegls. I saran stats preschaints üna vainchina da delegats our da tuot nossas valladas, homens per part bainischem süls ans cun barbas grischas e nairas ed eu crai dad avair vis là per la prüma jada al magiur Tumasch Gross da Tschierv (il prüm chaschier da la Società retorumantscha), vegl cusglier naziunal Andréa Vital da Ftan (president da quella dal 1898 al 1925), Jon Clos Brunner da Lavin (editur da la Chasa Paterna), Andreia Steier da Riom, prof. Chasper Pult da Sent (redactur dal DRG) e sco'l plü giuven tanter ils barbüts il landamma d'Engiadín' ota, dr. Robert Ganzoni. In üna posetta tanter duos tractandas gnit el nan tals scolars, as indreschit da lur noms, lur intenziuns professiunalas ed ans bandunet lura darcho cun ün cordial incuraschamaint da seguir cun interess a las dumandas ventiladas in quaist nouv forum rumantsch, al qual nus svess faran part in pacs ans. Ils pleds da l'hom da cumparsa näbla nun han mancà lur effet, e quel prüm inscunter ais dvantà almain per mai il cuman-zamaint d'üna cooperaziun a favur da nossa lingua dürant 40 ans.

Robert Ganzoni ais nat ils 7 settember 1884 a Schlarigna sco figl da Robert Antoni e dad Ursulina nata Tognoni. Schlarigna eira quella vouta amo il cumün preponderantamaing agricul chi avaiva mantgnü il caracter prüvà, cha inscuntrains aint illas novellas da

Giovannes Mathis, mort l'an 1912. El eira però eir il cumün aint il qual spiert uschè activs e cumpetents sco landamma Zaccaria Pallioppi e seis figl, ravarenda Emil Pallioppi, han ideà e redat lur admirabel «Dizionari», chi per blers decennis restet ün impajabel instrumaint per mincha scriptur e perscrutadur da nossa favella. Quaist ambiaint ha exercità üna ferm' influenza sül giuven sensibel. Là a Schlarigna as sentiv' el il plü vantüraivel eir i'l's ans chi portettan a quaist cumün ün svilup na in tuots grads favuraivel.

Davo avair frequentà las scoulas da seis lö natal as rendet el a Cuoira a la Scoula chantunala e stüdget in seguit giurisprudenza a diversas universitats, l'ultim a Berna, ingio ch'el fet il doctorat. Ant co as stabilir definitivmaing sco advocat in seis Schlarigna absolvet el amo ün tschert temp da pratcha a Tavo.

La prüma perioda da si' operusità in Engiadina rinserra in sai varsaquants ans dal temp da guerra cun la greiva depressiun economica chi la seguit. La situaziun desperada dals hotels adüsats ad üna clientella chi spendaiva bler per spür prestige, uossa però vöds ed inabels da pajar ils fits da chapital, avet greivas consequenzas socialas per ün grand numer da famiglias engiadinaisas privadas in pacs ans dals früts da lur lavur. L'occupaziun constanta cun talas relaziuns avrit ils ögls al giuven advocat pels problems socials insomma. Uschè inclegiainsa cha eir dürant il temp ch'el servit a seis circul sco landamma, per temps eir sco deputà al Grand Cussagl, güsta quaists problems füttan quels, als quals el dedichet sias megl-dras forzas. Ma eir la situaziun culturala d'Engiadin' ota chi vezzaiva in privel sia veglia favella ladina ed a medem temp üna part da las bellezzas da sia natüra incumparabla il preoccupaiva cuntuadamaing. Ill' Uniun dals Grischs chattet el il rauuogl tscherchà per organisar la defaisa da la lingua.

L'an 1926 il pövel grischun tschernit a landamma Robert Ganzoni aint il Pitschen Cussagl, ingio chi al gnit affidà il Departament d'educaziun e da sanità. In quaist departamaint al suprastet cun regard a nossa favella la spinus' incumbenza da metter term a la guerra ortografica ladina proruotta in connex culla cumpilaziun dal nouv dicziunari ladin da la Lia rumantscha. Las propostas per üna refuorma fattas dals duos redactuors Reto R. Bez-zola e Rud. O. Tönjachen eiran gnüdas sustgnüdas dals linguists cumpetents e da la Lia rumantscha, ma cumbattüts paschiunadamaing

da tscherts circuls in Engiadina. Il Departamaint d'educaziun gnit sforzà da tour posiziun in merit, eir perche chi as trattaiva da stabilir l'ortografia impegnativa pels nouvs cudeschs da scoula. Dr. Ganzoni as decidet per las innovaziuns, malgrà tuot las immnatschas e las greivas consequenzas persunalas chi eiran da prevair. E las consequenzas per sia carriera politica nu fettan spettar lönch: Ils 3 marz 1935 illa tscherna dal rapreschantant grischun aint il Cussagl dals Stadis Robert Ganzoni succombet inaspettadamaing a seis rival. Las vuschs mancantas al avessan stuvü gnir dattas dals Engiadinalis, chi separats tras la guerra ortografica e tras cumbats da parti nun as savettan resolver da s'unir a favur da lur cumpatriot, la qualificaziun dal qual eira incontestabla.

La chüra per noss' ierta linguistica ais restada vigurusa dürant tuot il temp d'uffizi dal magistrat ladin. D'importanza per noss magisters sun stats pustüt ils cuors linguistics organisats l'an 1931 a Razén, 1932 a Zuoz, 1933 a Breil e 1934 a Savognin, dals quals ils rapports da la Lia rumantscha relateschan il necessari. Ün rapport detaglià dal cuors salvà a Breil ais publichà da dr. Ramun Vieli aint illas Annalas 48, p. 245—293.

Da la blerischma lavur chi aspettaiva cuntuadamaing sül champ dal Departamaint da sanità vulessans manzunar be ün pêr acziuns specialas:

L'an 1930, dimena dal temp cha Robert Ganzoni eira cho da quaist departamaint, gnit constitui il «Fuond Cadonau Pro Juventute». Grazcha ad üna donaziun ourdvart generusa fatta dal Sursilvan Anton Cadonau apostà a favur da la giuventüna grischuna, ais nos chantun daspö il 1930 in possess d'ün chapital da passa ün milliun francs, ils fits dal qual dessan gnir impondüts exclusivamaing a bön dad uffants o dad instituziuns chi s'occupan dal fliamaint, da la chüra ed educaziun da tals, uschè inavant cha que nun ais incumbenza regulara dal stadi. Seguind al cussagl da Ganzoni gnit l'administraziun da quaist nouv fuond missa in man da la «Fundaziun (svizra) Pro Juventute» chi elegia ün comitè d'administraziun apostà. Quaist comitè dvantet il raruogl, aint il qual nos cusglier guvernativ sviluppet dürant ch'el faiva part a la Regenza, ma na main davo esser turnà a Schlarigna üna quantità d'ideas ed iniziativas, chi dvantettan üna vaira benedicziun. Da sias ideas realisadas nomnainsa in prüma lingia «Giuvaulta», il bagn per uffants,

e la «Chasa per uffants» a Veulden, duos instituts als quals Ganzoni restet attachà fin a sia mort. Da la vastezza dal champ d'operusità chi profitet da sia iniziativa raquinta detagliadamaing seis referat «12 Jahre Fuond Cadonau Pro Juventute» salvà ils 31 d'october 1942 a Cuoir e stampà in üna plaschaivla broschüra cun 26 illustraziuns.

Grazcha a l'iniziativa ed a l'intelligainta e perseveranta laver da rav. B. Andry a S-chanf, l'idea d'ün «Asil pels vegls» in Engiadina pigliet già l'an 1941 fuormas plü concretas. Ella chattet eir in dr. Robert Ganzoni ün fidel ami. Las relaziuns amicalas ch'el cultivaiva cun circuls influents da la Svizra bassa füttan in seguit la premissa per la finanziaziun e realisaziun dal proget Chasa Puntota a Scuol.

I nun as po trattar qua dad enumerar tuot las otras acziuns da caracter social, acziuns cun resultat main visibel, ma suvent na main important, chi gnittan instradadas ed in part eir realisadas dad el in seis nouv ans da cusglier guvernativ. Finin quaista cuorta survista atschegnand a l'«Ordinaziun executiva per la Ledscha federala cunter la tuberculosa» cumpilada interamaing da nos cusglier puter ed acceptada dal Grand Cussagl ils 22 november 1933.

Davo seis retuorn in Engiadina l'an 1936 il district Malögia elegit il versà giurist già stat landamma dal circul sco president dal güdisch districtual; el operet sco tal dürant 15 ans. Seis collega, cusglier guvernativ Andrea Bezzola, attesta aint il «Bündner Jahrbuch 1964» p. 166 cha Ganzoni haja cumpli seis dovairs da güdisch in möd exemplar, e cha seis collegas admiravaian seis zeli, seis giudicats radschunaivels e seis caracter conciliant. — Cha in quaista si' operusità quintaivan dasper ils singuls cas eir las dumandas da princip da la legislatura e da la punizion, attesta seis tractat «Il dret penel svizzer e la giuentüna» (vair Annalas 57, p. 112). Manzunar vulains amo la cooperaziun dal president dal güdisch vi a la translaziun ladina dal Cudesch penal svizzer.

Redactur dal Fögl d'Engiadina

Per la fin da l'an 1936 il redactur dal Fögl d'Engiadina, sar ravarenda G. P. Guidon giavüschet da's retrar da la redacziun dal Fögl, al qual el avaiva servi daspö il 1916. Vegl cusglier guvernativ dr. Robert Ganzoni, güst sorti da la Regenza et urnà in Engiadina,

as mettet a disposiziun da nossa gazetta ed entret sco redactur da quella in favrer 1937. Ils temps eiran burrascus. In nos chantun ils cumbats da partits tanter liberals e democrats eiran plü fervents co mai, in Engiadina las duos gazettas, Fögl d'Engiadina e Gazette Ladina ris-chaivan da dvantar organs da partits. Il giavüsch d'üna buna part dals Ladins, da fusiunar las gazettas, giavüsch cha pustüt la giuvna Ladinia, secziun studentica da l'Uniun dals Grischs, nu gniva stangla da pronunzchar, paraiva da dvantar definitivmaing irrealisabel. La vocaziun da redactur, uschigliö spinusa avuonda, impromettaiva suot talas circunstanzas pacä satisfacziun ed amo main arcugnuschentscha publica. Ganzoni, hom da parti, convint liberal, avaiva però in mira chosas chi staivan sur ils partits. Sco nouv redactur dal Fögl savet el impedir cha quel as metta o as lascha chatschar in opposiziun a la Gazette Ladina e cha tuottas duos dvaintan in lur möd fantschellas dals partits politics. Il respet vicendaivel chi regnaiva da prüm d'innan tanter Ganzoni e'l poet vallader, Men Rauch, redactur da la Gazette Ladina, füt ün bun garant per ün abalchamaint dals spierts e malspierts partischans, e l'an 1940 la fusiun da las gazettas suot il titul «Fögl Ladin» dvantet realtà. L'Uniun dals Grischs chi promovet quaista fusiu suot la presidenza da sar dr. Ruduolf Champell nun avess pudü chattar ün meglider realisader da quaist plan co Robert Ganzoni. El servit inavant al Fögl Ladin sco redactur puter insembel cun Men Rauch fin l'an 1945, ch'el affidet alura seis post a giunfra Domenica Messmer, chi dal rest daspö blers ans eira la pozza principala da nos Fögl. Eir davo sorti da la redacziun, Robert Ganzoni restet ün collavuratur diligaint e stimà. Ils artichels firmats cun -z- avaivan blers grats lectuors.

Protecziun da la patria e da la natüra

Id ais remarchabel ed insolit, ch'ün hom paschiunà per duman-das socialas possa as dedichar culla medemma paschiun eir a du-mandas da la protecziun da la natüra e da la patria. Tar Robert Ganzoni quaista dubla inclinaziun eira unida armonicamaing in üna persuna. Dasper sia lavur d'advocat, da landamma, da güdisch, da commember dal cussagl d'administraziun da l'Ospidal circuital da Samedan, dal Lyceum Alpinum, dal Fuond Cadonau Pro Juventute etc. marchan d'ün cuntin üna o plüssas acziuns da protecziun da las

bellezzas da nossa val alpina. El as rechatta tanter ils prüms chi s'oppuonan già ant la prüma guerra mundiala cunter il proget barbaric da far our dal lej da Segl ün reservuar da las «Forzas idraulicas bergagliottas». Eir el ais decis dad impedir ch'üna perla sco quaist lai dvainta per plüs mais da l'an ün pantan da las auas su-vent tuorschias da la Fedacla, da l'Ova da Fedoz e da l'Orlegna, per oters mais ün puoz mez vöd cun rivas belmusas e nüdas. La si-tuaziun economica fich disfauraivla tant da la Bergaglia co da Segl, ils marenghins esters in part talians chi inchantaivan tant ils cumüns co singuls privats eiran üna pussanza, chi in tals cas solaiva schmerdscher tuots impedimaints. Chi chi vulaiva s'oppuoner a quaists gigants stuvaiva savair, cha'l cumbat füss där e seis esit dal tuot in-tschart. Da talas perspectivas ed eir dad imnatschas avertas e zop-padas, polemicas ed attachas personalas Robert Ganzoni sofriva bainschi, ma nun as laschaiva metter our d'chanvà. Cundun a cun-dun cun ün pêr amis organiset el la defaisa aint illa secziun engia-dinaria da la Società per la protecziun da la patria fundada l'an 1926, creet plü tard alura la cumünanza Pro Lej da Segl (1944) e reuschit cun agüd da quella a stabilir ün statut da protecziun dal plü bel lai da nos chantun. Il cumbat ais stat där. La nécessità da recumpensar in qualche möd ils cumüns da Segl e Stampa, propri-e-taris dal lai, avess laschà desperar a blers, perche i's trattaiva da metter sün maisa l'import da 300 000 francs. Sco commember da la Fundaziun Pro Helvetia (dal 1939 fin 1952) chattet el ün prüm sustegn per seis plans pro'l president da quella, vegl cusglier federal dr. H. Häberlin, a medem temp president da la Società svizra per la protecziun da la natüra. La reuschida det però pür la famusa idea d'ün seguond ami e commember dal Cussagl da la Pro Helvetia, dr. Ernst Laur, quella nempe da ramassar la mera part da l'import ne-cessari vendand ün taler da tschiculatta in tuot la Svizra. Quaista vendita fatta l'an 1945 d'ün temp cha la tschiculatta eira amo ra-ziunada, füt üna sensaziun; il rechav a favur dal Lej da Segl arrivet a la bella somma da 200 000 francs. Il rest gnit finanzià our dad otras funtanias. L'an 1946 pudettan alura gnir firmats ils contrats dals cumüns da Segl e da Stampa cun la Cumünanza «Pro Lej da Segl», areguard l'erecziun d'ün reservat. Il prüm paragraf da quaist memorabel contrat tuna:

«La vschinauncha da Segl (resp. da Stampa) do sieu acconsentiti-

maint per cha la Cumünaunza Pro Lej da Segl e sieus successuors in dret fatschan tuots pass indichos per preserver las bellezzas natürelas dal Lej da Segl e sias rivas confuormamaing a las disposiziuns chi seguan».

Ün nu pudess s'imaginar ün plü bel e profuond cumplimaint al spiert, chi regna in quaist contrat, co quel, cha quatter ans plü tard il cumün da Silvaplauna firmet cun la Pro Lej da Segl ün contrat analog per la protecziun dal Lej da Silvaplauna-Champfèr, al qual l'an 1951 seguit ün contrat cul cumün da San Murezzan merit la protecziun da seis lai.

Intant las impraisas da las forzas idraulicas realisettan il proget gigantic da l'Albigna-Orlegna e Maira, pigliettan in fabrica il proget chi explotescha l'En cul Spöl ed oters affluents. La tecnica chattet uschè la via per as procurar utrò que chi la stuvet gnir refüsà süsom l'Engiadina. Ils trais lais sur Charnadüras glüscheran inavant in lur serainezza, allegraran inavant ögl e cour da quels chi tscherchand pos e recreaziun as tschaintan a lur rivas. La strasora chi ris-chaiva da tuorblar lur auas ais passada, e bainbod be pacs pensaran als privels chi als imnatschaivan.

A nus para, cha sün qualche spelm da la penisla Chastè bod o tard üna modesta tabla stuvess algordar a lur protectuors e tanter quels a Robert Ganzoni in prüma lingia.

Il president da la Società retorumantscha

L'an 1934 Jachen Luzzi da Ramosch, quella jada amo domicilià a Cuoira exprimit il giavüsch da gnir schlubgià da la presidenza da la Società retorumantscha. Prevezzand la creschainta lavur e responsabilità dal president in vista a l'ingaschamaint d'ün seguond redactur dal Dicziunari rumantsch grischun, al cumanzamaint da la stampa ed ouravanttuot da la finanziaziun da l'intera intrapraisa, ingün suprstant nun as musset propens da surtour la successiun da sar Jachen. A prof. Ramun Vieli reuschit que alura da persvader il cho dal Departamaint chantunal d'educaziun, cusglier guovernativ dr. Ganzoni da's metter al timun da la SRR. El fet però per cundiziun, da nun avair da s'occupar eir da la redacziun da las Annalas. Quaista restet perque affidada inavant al poet ramoschan.

Ils 15 december 1934 presidiescha Robert Ganzoni per la prüma vouta üna tschantada da la suprastanza. «La suprema mira da la SRR», disch el üna vouta, «ais da promover la vita spiertala rumantscha». Quaist böt nun as lascha realisar be cun l'ediziun da las Annalas e dal Dicziunari rumantsch grischun. El dumanda blerant ün program d'acziun sün ün champ cultural plü vast. Sco cha la Società istoric-antiquara grischuna provet daspö blers decennis da promover l'interess per l'istorgia organisand referats a Cuoira ed almain üna vouta l'an eir in cumüns da nos chantun, uschè aspettaiva dr. Ganzoni eir per las meras da nos movimaint rumantsch buns früts intensifichand la vita spiertala cun agüd da referats. Dürant ils 20 ans da sia presidenza quaistas manifestaziuns culturalas avetan adüna bunischem success.

La richezza d'ideas, e da propostas tant per acziuns co per discussiuns cun böt da sclerir ils problems da nos movimaint ais dvantada caratteristica eir per las tschantadas da la suprastanza. Il president nun eira improvisatur. El gniva cun impissamaints già ponderats e madürats, el ils pronunzchaiva in fuorma degna e concilianta eir cur ch'el eira sforzà da s'oppuoner a qualchün. Uschè eir seis pleds proferts già l'an 1935 cunter las aspiraziuns irrendentisticas da tscherts circuls talians füttan tals, ch'els avessan pudügnir publichats sainza restricziuns.

Per l'avischinaziun dals idioms rumantschs al paraiva la SRR da prüm d'innan il raviogl predestinà. Memma realist per s'azardar in experimaints da fusun sco cha'ls prüms pioniers da nossa società avaivan fat, pensaiv' el tuottüna cha pass a pass la mancanza da vöglia da s'incler possa gnir superada. El vain già ils 22 november 1935 cun l'idea dad edir cudeschs da chant cumünaivels per tuot l'intschess rumantsch. Il cudesch da chant per la scoula «Grischun, il giuven chantadur», cumpars l'an 1942 fuolla la via a la «Guardia Grischuna», Cudisch de cant per cor viril concepius sut la tgira della Societad retoromontscha ed a la «Laudinella», Cudesch da chant per cor masdo, tuots duos cumpars l'an 1948. La volontà dad unir texts rumantschs da tuots idioms in *ün* cudesch madürescha l'an 1941 il Muossavia patriotic intitulà «Sulom patern», cumpilà da dr. Otto Gieré, Sep Modest Nay, Men Rauch e Gion Duno Simeon. Eir il cudesch da tarablas cumpars l'an 1951 in *ün* ediziun ladina «Nossas Tarablas», 1952 in linguach sursilvan «Nossas Praulas» eira

il prüm pensà sco unic cudesch in duos idioms. Siand ch'el as volva in prüma lingia als uffants, nun as laschet quel plan realisar. Ma i vanza il fat allegraivel cha tuots duos cudeschs preschaintan üna schelta da tarablas our da tuot il Grischun rumantsch e servan dimena in lur möd listess a l'avischinaziun da nossas regiuns rumantschas.

La reputaziun da la Società retorumantscha sco organisaziun solida ed activa la portet, sainza ir tscherchand, diversas nouvas lusin-giantas incumbenzas. Uschè ils iertavels da nos vegl suprastant, prof. Balser Puorger, l'affidettan l'ediziun da sias novellas, ediziun pubblichada in duos volüms ils ans 1952 e 1953 insembel cun l'Uniun dals Grischs. Las medemmas duos uniuns publichettan alura ils ans 1954 e 1956 eir Raquints e Meditaziuns da Schimun Vonmoos. Sar dr. Ganzoni avaiva eir fat ils prüms pass per edir l'ouvra cumpletta da Giovannes Mathis.

Las vastas cugnuschentschas acquistadas sco commember da la Regenza grischuna ed alura plü tard sco commember da la Fundaziun Pro Helvetia in dumandas culturalas han adüna darcho stimulà il president da la SRR da tscherchar e cultivar il contact cullas otras culturas svizras e cun lur instituziuns. Già dal 1938 aise manzuns da cuntracambis d'ideas culla Nouva società elvetica, dal 1940 alura culla Cumischiun da radio e culla Fundaziun Pro Helvetia, ed in seguit culla Pro Grigioni Italiano, la Pro Raetia, il Servezzan svizzer da la pressa (Schweiz. Feuilletondienst). Dapertuot provaiv' el in seis möd reservà e qualvoutas ün miel circunstanzius, ma adüna correct da svagliar l'incletta per las relaziuns specialas da nos chantun, da nos pövel, nossa lingua. E sch'el eira bainvis, schi stimà e venerà in quaists circuls culturals, schi perche ch'el nu gniva be cun seis agens pissers, ma savaiva da's approfundir eir aint ils problems e bsögns da las otras parts da nossa patria. Id ais remarchabel cha quaist bsögn dad agir in ün vast orizont nu tramurtit mai seis sen da responsabilità pels vegls dovairs da la SRR, las Annalas ed il Dicziunari rumantsch grischun. L'annuari entrà dal 1934 in sia 48avla annada al staiva anzi uschè a cour, chi passaiva dinrar üna tschantada da la suprastanza, sainza chi and füss gni fat manzuns. Adonta dals cuosts da stampa, chi surpassan cuntuadamaing il rechav our dal modest numer d'abunents, l'extensiun da minch' annada ais restada per uschedir constanta, uschè chi pudet gnir publichà ün richischem material litterar, folcloristic ed istoric.

Hoz cha la publicaziun dal Dicziunari rumantsch grischun proseguischa malgrà la capacità limitada da nossa stamparia in ün tempo regular e satisfacent, as stainta da s'imaginar che difficultats chi füttan da superar be per pudair dar l'an 1938 in stampa il prüm faschicul da l'ovra. Las subvenziuns bassischmas nun as basaivan amo sün conclus da las chambras, e gnivan missas in privel an per an da las cumischiuns chi elavuraivan il büdschet. An per an l'ümiliant dovarir dad ir a rovar per uschedir culs mans insembel, da'ns dar ils mezs necessaris per pudair tgnair l'ovra sur l'aua via, consümaiva forzas ed entusiassem. Las relaziuns amicalas cha Robert Ganzoni avaiva cun blers cusgliers chantunals, naziunals e federals, pustüt la stima ch'el giodaiva tal cho dal Departamaint federal da l'intern, cusglier federal dr. Philipp Etter, ed alura seis dun da collavurar culla Cumischiun filologica e la redacziun dal DRG han però surmuntà quaistas enormas difficultats, da maniera cha l'an 1955, surdand il timun a seis successur el pudet dir, cha'ls ans da chüzza epidemica sajan superrats e cha la nouva basa finanziala datta tras il conclus federal dals 23 gün 1955 e da quel chantunal dals 28 november 1955 sajan buenischems garants per ün svilup prosperaivel dal Dicziunari. Ed el ha gnü radschun.

Illa radunanza generala da la SRR dals 22 november 1955 il vegl president dr. Robert Ganzoni gnit nomnà president onurari da la Società retorumantscha. La pergamina chi attesta quaista undrentscha al gnit impalmada da seis successur, dr. Nicola Gaudenz, in ün act solen dictà da profunda arcugnuschentscha.

Il fundatur da la Cumünanza radio rumantsch

Davart il svilup da las emissiuns rumantschas daspö l'an 1925 relatescha Tista Murk aint il rapport annual da la Cumünanza radio rumantsch per l'an 1953–1954. Da quel rapport resulta (p. 5) cha dr. Robert Ganzoni, daspö il 1938 rapreschantant rumantsch aint illa cumischiun dals programs da Beromünster, avaiva s-chaffi üna organisaziun consultativa chi cumpigliaiva rapreschantants da tuot ils idioms rumantschs. Da quaist rauogl sortittan 2 organisaziuns importantas: Üna pitschna cumischiun da programs da trais homens chi prestet dürant divers ans buna lavour ed alura, ils 12 october 1946, üna società s-chaffida apostata per guandagiar ils interess dal ru-

mantsch al radio, la Cumünanza radio rumantsch. La mira da seis fundatur e prüm president füt quella da survgnir ün portavusch dal pövel chi possa far valair noss giavüschs visavi a «Berna» e chatta planet access aint illa Società svizra da radiodiffusiun. Da l'enormità da chartas, appuntamaints, conferenzas, instanzas cha dr. Ganzoni ha gnü da scriver, ant cha per Büman 1954 la recepziun ufficiala da la Cumünanza radio rumantsch in quaist rauogl federal füt accumplida, ingün nun ha ün' idea. Cun radschun seis successur illa presidenza, Tista Murk, disch cha'l prüm president saja stat fidel a l'intrapraisa fin cha quella dvantet majorennna ed abla dad accumplir sia missiun. Il svilup vairamaing impreschiunant da las emissiuns rumantschas dvantet plü evidaint pür davo cha'l prüm pionier avaiva affidà l'organisaziun a nouvas personas. Ma i resta incontestabel cha quaista vantüraivla crescentscha füss stattta impussibla scha'ls pregüdizis, dubis ed impedimaints amo plü serius nun avessan cedü già avant a la tenacità dal cumbattant schlarinot.

Ils noms ufficials da noss cumüns

Il svilup da l'administraziun chantunala e federala ed impüstü quel dals mezs da comunicaziun (posta, viafier, telegraf, telefon) ha pretais fingià intuorn la mità dal 19avel tschientiner la cumpilaziun da registers ufficials dals noms dals cumüns, da fracziuns cun uffizi da posta, staziuns etc. Ils prüms registers da tal gener nu cu-gnuschaivan üna nomenclatura rumantscha. Schi, perfin il register dals noms locals ufficials da la Svizra, publichà dal 1911, manzuna per noss cumüns rumantschs be noms tudais-chs o talians. Daspö la fundaziun da la Lia rumantscha l'an 1919 il problem da la nomenclatura ufficiala tuorna per uschedir an per an illas discussiuns ed as cristallischescha in instanzas bainfundadas als uffizis federales e chantunals. Ma tuot paraiva dad esser invan; ün ans inculpaiva da fanatissem linguistic, da mancanza da sen per las realtats etc. Entrà l'an 1927 aint illa Regenza grischuna, dr. Ganzoni as mettet dalum vi dal stüdi da l'istorgia da la nomenclatura ufficiala e da las vias chi pudessan manar ad üna soluziun cuntantaivla da la spinusa dumanda. Vzand cha'l process da germanisaziun dals noms locals eira tuot oter co a fin, anzi ch'el canticuaiva sül champ dals noms da nossa pizza ed insomma in quels lös chi interessan ils alpinists, il cho dal

Departament d'educaziun creet il prüm üna «Cumischiun chantunala da Nomenclatura». Quaista cumischiun nomnada dal Pitschen Cussagl as cumpuona da rapreschitants da tuots traiss intschess linguistics e lavura tenor il princip da la territorialità, chi nun admetta nouvs noms tudais-chs in terra rumantscha e taliana ed in princip natüralmaing neir viceversa. In seis 30 ans d'operusità quaista cumischiun ha puorgià la nomenclatura da nossas cartas naziunalas da differentas scalas, da maniera cha hoz las cartas dan cler sclerimaint davart la repartiziun dals linguachs da nos chantun. Main glisch get l'eliminaziun dals noms tudais-chs dals cumüns. Müdadas da tals noms po decider be il Departament federal da posta e viafier. Que cha la Cumischiun da Nomenclatura nu rivet da realisar sün quaist champ, que reuschit a la perseveranza da Robert Ganzoni, chi in quaista dumanda nu vezzaiva be üna questiun da prestige, ma ün töch cumbat per l'indipendenza spiertala d'üna part da nossa naziun svizra. Siand cha'l cumbattant stess ha descrit l'an 1944 l'istorgia dal «problem dals noms ufficiels in nossas vschinaunchas rumantschas» (Annalas 58, p. 22—43), pudains rinviar per tuots detagls a quaist referat.

Pro quarta lingua

Las relaziuns amicablas tanter la Svizra e l'Italia han subi dürant ils ans tanter las duos guerras mundialas üna crisa bainischem seriusa in consequenza da las aspiraziuns irredentisticas cha tscherts circuls naziunalists da l'Italia propagiaivan cun creschainta velenza. Tant ils Grischuns talians e Tessinais (cun pakischmas excepziuns) co ils Grischuns rumantschs nun as laschettan confuonder da la grammatica politica da glieud sco Carlo Salvioni e Carlo Battisti, anzi, i règnaiva üna ferma tendenza da l'ignorar cumplettamaing. Ma in vista al fat cha'l faschissem talian s'impatrunit da l'irredentissem per popularisar seis program naziunal, la defaisa organisada da vart svizra s'impuoniva adüna plü decisamaing.

In quant al rumantsch il clam da Peider Lansel «Ni Talians ni Tudais-chs» dumandaiva finalmaing üna posiziun clera da vart dal pövel svizzer invers nossa favella sco lingua independenta. Da quaista situaziun naschit il spiert da defaisa chi as manifesta aint il Sain Pitschen, l'organ da la giuvna Ladinia fingià in sia prüm' annada e

chi as cristallisescha daspö il 1931 i'l giavüsch cha l'artichel 116 da la Constituziun federala vegna müdà incirca uschè: «Il tudais-ch, il frances, il talian e'l rumantsch sun las linguas naziunalas da la Svizra. Sco linguas ufficialas veggan decleradas il tudais-ch, il frances e'l talian». (Otto Gieré in Sain Pitschen 1931, p. 27). Nus nu vulessan far qua l'istorgia da quaista iniziativa a partir dal Sain Pitschen, passand da la moziun da Sep Modest Nay aint il Grand Cussagl (1934) a l'instanza dal Pitschen Cussagl al Cussagl federal (1935) etc. fin a la memorabla votaziun federala dals 20 favrer 1938. Ma i descha da manzunar in quaista skizza biografica l'art e part da Robert Ganzoni aint ill' acziun, chi suot il titul «Pro quarta lingua» preparet la votaziun. Seis referat «Il rumantsch sco quarta lingua», salvà ils 1. october 1935 al cuors linguistic per magisters a Savognin ais üna bella e persvadenta motivaziun dal giavüsch dals Rumantschs. Ganzoni füt alura quel chi ils 22 mai 1936 constituit il comitè d'acziun, dal qual el in seguit gnit nomnà president cun acclamaziun. Davart la lavur cha quaist comitè prestet, da las bleirischmas chartas, orientaziuns, conferenzas etc., relatet Ganzoni svess detagliadamaing aint il rapport annual da la Lia rumantscha pels ans 1936/37. Ma i fa dabsögn dad agiundscher, cha il stüdi da las actas dal comitè archivadas in «Chasa rumantscha» a Cuoir füssan in cas da muossar, cha quaist rapport manzuna in möd memma modest la part lavur chi incombet al president sulet.

*

Il temp chi ans separa dal di dal decess da cusglier guernativ dr. Robert Ganzoni ais amo memma cuort per permetter ün stüdi biografic sur da quaista remarchabla personalità. Ün' analisa objec-tiva da sias quasi indombrablas chartas, da seis rapports in tantas e tantas materias, dals protocols chi fixan discussiuns e deliberaziuns tuttas illas cumischiuns, ch'el presidiaiva, dvantarà però necessaria per chi chi üna jada s'occuparà da la politica culturala da la prüma mità dal 20avel tschientiner. Ingünas actas nu pudaran però revelar ils trats ils plü intims da seis caracter. Robert Ganzoni eira memma reservà per perder pleds davart ils sentimaints e las ponderaziuns chi eiran il fundamaint da seis agir. A seis bsögn da cultivar il contact persunal cun amis e cuntschaints per ragiundscher ün böt ch'el

stimaiva degn da lavur e stainta, s'opponiva suvent il dubi, ün pudess quasi dir la temma, dad esser malinclet. El pudaiv' esser circunstanzius e cumplichà eir là ingio cha oters stimaivan las chosas per simplas ed evidaintas. L'acziun al eira ün bsögn, ma a medem temp ün pantizi. E que svagliet be memma suvent il suspect ch'el in se saja indecis, per nu dir tmüch. Chi chi però prova da far l'inventar da las ovras ch'el ha guidà a bun term, chi chi sa novas dal sproposit dad obstaculs malnüz, dad opposiziuns per part inclegiantaivlas causa la multifarietà d'avis e d'interess materials ed ideals chi separan la società humana, per part però be il penibel resultat da quel temp, ingio cha üna part da nos pövel as perdaiva in bluords cumbats da partida, quel vain ad ün' otra conclusiun. Robert Ganzoni, üna jada ch'el s'avaiva persvas da la nécessità d'üna buna chosa nu la laschaiva plü our d'ögl ed our d'man. Be uschè as poja incleger ils success ch'el obtgnet sco magistrat, sco güdisch, sco politiker social e cultural. E tuottüna brich be uschè: A sia perseveranza s'univa üna profuond' amur per seis pajais e seis pövel, ed insomma per la società humana e finalmaing ün caracter s-chet e nöbel. El eir' ün galantom.